

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : MASA PERTANYAAN MENTERI

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 17 NOVEMBER 2020 (SELASA)

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI ALAM SEKITAR DAN AIR** menyatakan perkembangan Program Masjid Hijau. Apakah perancangan pihak kementerian terhadap program ini dan bilakah program ini akan diperluaskan ke seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat,

1. Sukacita dimaklumkan bahawa program Masjid Hijau sedang dalam perancangan untuk diperkembangkan ke seluruh Negara. Program Masjid Hijau ini adalah dibawah program induk Rumah Ibadat Hijau yang merangkumi geraja, tokong, kuil dan rumah ibadat lain. Pihak Kementerian bersama - sama Malaysian Green Technology and Climate Change Centre (MGTC) sedang memperhalusi mekanisma pelaksanaan yang lebih inklusif dan mampan dengan memperkenalkan inisiatif Rumah Ibadat Angkat. Inisiatif ini mengalakkan agensi, jabatan atau badan koperat memilih untuk bekerjasama dengan rumah ibadat pilihan dan memberi komitmen dalam bentuk sumbangan masa, tenaga dan kewangan kepada rumah ibadat tersebut dalam menjayakan objektif program ini.

NO. SOALAN : 1

2. Program Rumah Ibadat Hijau akan dijayakan melalui kolaborasi di antara Kerajaan dan Sektor Swasta terutamanya dari segi pembiayaan kewangan bagi aplikasi teknologi hijau di rumah ibadat seperti pemasangan sistem Solar PV bumbung dibawah program '*Net Energy Metering*' (NEM) dan pemasangan sistem penuaian air hujan (SPA). Pihak Kerajaan dan MGTC pula akan menjalankan aktiviti pembangunan kapasiti, promosi dan pemantauan berserta pengukuran dan verifikasi.
3. Objektif program Rumah Ibadat Hijau adalah untuk menjadikan rumah ibadat:
 - a) sebagai pusat pemangkin kelestarian alam sekitar dalam memupuk budaya gaya hidup hijau dikalangan ahli kariah; dan
 - b) sebagai contoh bangunan komuniti yang cekap tenaga, cekap air, mesra alam dan rendah karbon.
4. Program Rumah Ibadat Hijau menekankan kepada 4 elemen hijau iaitu jimat penggunaan tenaga elektrik, jimat penggunaan air terutamanya ketika berwuduk di Masjid dan Surau, kurangkan penajanaan sisa dan uruskan sisa buangan dengan teratur serta mengalakkan pembelian dan penggunaan produk hijau. Objektif program Rumah Ibadat Hijau dapat dicapai melalui 3 pembolehcara iaitu membina kesedaran amalan hijau di kalangan ahli kariah, menerapkan dan mengembangkan budaya gaya hidup hijau dalam komuniti dan mewujudkan mekanisma Sumbangan Rumah Ibadat Hijau atau Wakaf Masjid Hijau untuk aplikasi teknologi hijau di rumah ibadat tersebut.
5. Khusus bagi umat Islam, Masjid ialah tempat beribadat bagi orang Islam dan juga merupakan pusat kebudayaan, muamalat, perkembangan dakwah Islamiah, serta pusat aktiviti umat Islam. Adalah menjadi tanggungjawab umat Islam dalam memastikan kepentingan Jemaah dan persekitaran masjid terpelihara.

NO. SOALAN : 1

6. Selaras dengan sifat cintakan alam persekitaran yang merupakan salah satu nilai murni yang diketengahkan dalam al-Quran', program Masjid Hijau telah dilancarkan pada 25hb September 2020 di mana Masjid Al-Hasanah di Bangi, Selangor menjadi perintis kepada program ini.

7. Untuk menunjukkan fokus dan komitmen Kementerian dalam mengerakkan pembudayaan gaya hidup hijau di peringkat komuniti, kesemua agensi dan jabatan di bawah Kementerian telah memilih 12 rumah ibadat di 8 buah Negeri untuk dijadikan Rumah Ibadat Angkat dan menjalankan program Rumah Ibadat Hijau. Perbincangan awal bersama MGTC, agensi Kementerian dan rumah ibadat pilihan sedang dijalankan secara berperingkat mengikut kesesuaian keadaan semasa.

8. Ia adalah sasaran Kementerian supaya program Rumah Ibadat Hijau dapat dijalankan di 100 rumah ibadat di seluruh Negara pada tahun 2021. Untuk maklumat lanjut berkenaan program Rumah Ibadat Hijau dan inisiatif Rumah Ibadat Angkat, Ahli Yang Berhormat boleh menghubungi MGTC.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : WAKTU PERTANYAAN MENTERI (MQT)

DARIPADA : YB DATO' JALALUDDIN BIN ALIAS [JELEBU]

TARIKH : 17 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan sejauh manakah penularan pandemik COVID-19 di negara ini memberi kesan pada sektor penternakan telur ayam yang didakwa telah menyebabkan penternak mengalami kerugian jutaan ringgit berikutan kenaikan harga makanan ternakan.

JAWAPAN

Tuan Yang di-Pertua,

1. Penularan pandemik Covid-19 telah memberikan kesan kepada keseluruhan aktiviti ekonomi di seluruh negara termasuk sektor penternakan umumnya dan industri ayam telur khususnya. Situasi ini telah mempengaruhi rantai nilai industri ayam telur dari aspek penurunan permintaan penggunaan telur dan kenaikan harga komoditi pasaran dunia bagi bahan asas makanan ternakan.
2. Pelaksanaan Perintah Kawalan Pergerakan (PKP) telah menyebabkan sektor makanan terpaksa mengehadkan pengoperasian. Hal ini telah menyebabkan penurunan permintaan dan penggunaan telur oleh restoran, hotel, kantin sekolah dan lain-lain. Namun demikian, pengeluaran telur telah berada pada tahap yang sama dan menyebabkan berlaku lambakan telur di ladang-ladang sehingga menyebabkan kejatuhan harga jualan telur dalam pasaran.

3. Berdasarkan harga telur di pasaran (berdasarkan harga telur Gred C), terdapat penurunan harga yang ketara sebanyak 38% kepada RM0.21/biji pada November 2020, berbanding RM0.34/biji pada April 2020. Ini telah menyebabkan penurunan margin keuntungan oleh pengeluar telur.
4. Selain itu, penternak turut menghadapi mengalami margin keuntungan yang semakin mengecil disebabkan kos pengeluaran meningkat yang telah disumbangkan oleh kenaikan harga makanan ayam sebanyak 4% hingga 5%. Kos makanan ini merupakan penyumbang kepada 70% daripada keseluruhan kos pengeluaran.
5. Kenaikan harga makanan ayam ini dipengaruhi oleh kenaikan harga bahan asas utama makanan ternakan ayam seperti jagung yang telah meningkat sebanyak 15.2% kepada RM1,100.00/tan pada November 2020, berbanding RM955/tan pada April 2020 dan kacang soya yang telah meningkat sebanyak 9.4% kepada RM2,100.00/tan pada November 2020 berbanding RM1,920.00/tan pada April 2020. Walau bagaimanapun, harga bahan asas makanan haiwan ini adalah ditentukan oleh harga pasaran komoditi dunia.
6. Sebagai langkah intervensi jangka pendek terhadap situasi ini, Kementerian Pertanian dan Industri Asas Makanan (MAFI) sedang mengadakan perbincangan bersama pihak pengilang dan Persatuan Pengilang Makanan Ternakan bagi membincangkan dan mencari jalan penyelesaian terbaik mengenai masalah berbangkit.
7. Pada masa yang sama, bagi memastikan bekalan makanan terutamanya bekalan telur domestik sentiasa mencukupi dan terjamin, MAFI sentiasa memantau bekalan makanan secara harian sejak pelaksanaan PKP sehingga sekarang di samping memastikan kebajikan penternak domestik sentiasa diambilkira. Maklumat dalam negara yang diperoleh daripada agensi kerajaan, pemain industri dan usahawan tani sentiasa dipantau dan dianalisa secara berkala.

Sekian, terima kasih.